

欽定大清會典事例

卷四百九十六
四百九十八

禮部

喪禮

欽定大清會典事例卷四百九十六

禮部

喪禮

子福晉喪儀

皇子喪儀

皇

皇太子喪儀。乾隆三年十月十二日。

端慧皇太子薨奉

諭。皇次子永璉。乃皇后所生。朕之適子。為人聰明貴重。

氣宇不凡。當日蒙

皇考命名永璉。隱然示以承宗器之意。朕御極以後。不即顯行冊立皇太子之禮者。蓋恐幼年志氣未定。恃貴驕矜。或左右諂媚逢迎。至於失德。甚且有窺伺動

搖之者。是以於乾隆元年七月初二日。遵照

皇考成式。親書密旨。召諸王大臣面諭。收藏於乾清宮正大光明扁之後。是永璉雖未行冊立之禮。朕已命為皇太子矣。今於本月十二日。偶患寒疾。遂至不起。朕心深為悲悼。朕為天下主。豈肯因幼殤而傷懷抱。但永璉係朕適子。已定建儲之計。與衆子不同。一切典禮。著照皇太子儀注行。元年密藏扁內之諭旨。著取出。將此曉諭天下臣民知之。欽此。遵

旨議准。謹案會典內並未開載

皇太子喪禮。我

朝典禮。凡冲齡薨逝。皆不成服。今公同酌議。除奉
旨辦理喪儀之王大臣。暨由宗人府奏請奉

旨成服之王公。及

皇太子侍從執事人員。咸應成服外。其內府佐領
內管領下官員。護軍驍騎人等。應以六百人成
服。王公官員。齊集喪次。咸素服摘冠纓。

紫禁城行走。

午門前朝會。各衙門辦事公所。仍綴纓緯。

皇帝素服七日。若

親臨皇太子金棺處。請摘纓緯。親王以下。有頂戴官員

以上。咸摘冠纓。素服七日。成服。王公官員兵丁人等。於初祭日除服。直省官員。於奉文之日。咸摘冠纓。素服三日。在京四十日。直省二十日。停止嫁娶音樂。再幼殤例無引旛。今請照雍正年閒懷親王喪儀。仍用引旛。其製造

冊寶。贈諡號。一應典禮。交與各該衙門辦理。奉

旨。在京官員軍民人等。初祭以內。著停止嫁娶作樂。直省於文到日為始。三日內停止嫁娶作樂。○又奏准應成服人員等。除上三旗侍衛九十人。內大臣散秩大臣應成服者。由領侍衛內大臣具奏請

旨。外藩額駙王公台吉公主福晉郡主等。於服內來京者。摘冠纓。去耳環。朝鮮使臣在京。令其素服七日。○又奏。本月十二日。

皇太子薨。照例輟朝七日。和碩親王以下。奉恩將軍以上。覺羅民公侯伯以下。有頂戴官員以上。公主福晉以下。鎮國將軍一品夫人以上。咸齊集。奉

旨。公主福晉等。著於十三日齊集。現今天氣寒冷。嗣後每逢祭日齊集。餘日不必齊集。○又奏准。

皇太子薨逝。行文各省。摘冠纓三日。軍營非各省

可比。應令軍營官弁兵丁素服三日。停摘冠纓。
○又奏准尚書房侍

皇太子讀書大臣官員六人。咸令成服。○又議准
十三日辰時。

皇太子入金棺吉。十六日卯時奉移吉。金棺照例
用枌木。內襯綵緞素緞七層。發引日束以紅織
金緞三道。幃帷咸用秋香色龍緞。設

几筵。陳銀五供。百日內朝夕奠獻。羹飯肴饌。日中
奠饌筵。朝晡奠獻時。儀駕全設。奉移以前。王以
下各官咸齊集。○十六日。奉移金棺於田村。豫

日行啟奠禮。

高宗純皇帝親臨祭酒。設儀仗陳冠服。

几筵前設祭品。列饌筵於露臺兩旁。設祭文案於殿東檐下。用金銀錠一萬。楮錢一萬。五色楮帛一萬。饌筵十五席。羊七。酒九尊。王以下有頂戴官員以上。公主福晉以下。鄉君大臣命婦以上。咸齊集。禮部堂官奉祭文入。設檐下西案上。俟上食畢。讀祝官奉祭文。於闕外正中。北嚮跪。衆皆跪。哀暫止。讀祭文畢。舉哀。祭酒三爵。每祭遣官一叩。衆隨行禮。舉哀畢。各退。讀祭文官奉祭

文內監奉冠服。送至燎所。焚畢。各退。○奉移日。

高宗純皇帝親臨視送。王公等於

東華門外。閒散宗室覺羅於

景山後。左翼各官於騎河樓西口。右翼各官於

景山東柵欄。漢官於

地安門外齊集。屆時。辦理喪儀。王公大臣。內務府

鑾儀衛。工部堂官。率校尉等奉移。

皇太子金棺。祭酒三爵。每祭一叩。金棺由

東華門中門出。登大輦。禮部堂官祭輦。祭酒三爵。

衆隨行禮。

靈駕發。前列儀駕。輦馬二十七匹。散馬二十三匹。駝十有八。執事王大臣官員左右翼衛。成服之王公隨行。侍衛班領率。

皇太子豹尾班槍六。儀刀四。後隨。所過門橋。遣散秩大臣一人祭酒。

靈駕所至。王以下各官。各於齊集處舉哀跪迎。候過步送。年老有疾王大臣及漢官。豫往田村殯宮大門外齊集。公主福晉以下。大臣命婦以上。豫於大門內齊集。成服婦女於命婦後齊集。靈駕至。各舉哀跪迎。王公大小官員。咸於

殯宮大門外分翼序立。執事王大臣奉安金棺。設几筵。祭酒三爵。衆隨行禮畢。各退。○百日内。奠獻不齊集。成服之王公內。有執事人員。除服後。分為三班。於奠獻時入內舉哀。內府官員護軍驍騎人內。以五十人為一班。更番入內舉哀。所有祭文由翰林院撰擬。饌筵奠酒由光祿寺。羊隻由慶豐司。近前饌筵由內管領。楮錢次幕等物由工部豫備。○二十三日行初祭禮。用金銀錠楮錢各十有一萬。畫緞一萬。楮帛五千。饌筵六十三席。羊二十一。酒二十五尊。

皇太子儀駕全設。

高宗純皇帝親詣祭奠。親王以下。入八分公以上。大學士內大臣。於二門外齊集。民公侯伯以下。有頂戴官員以上。於大門外齊集。近支王福晉等。於殯殿內齊集。和碩福晉以下。大臣命婦以上。於二門內西旁齊集。

高宗純皇帝乘輿由中門入。至月臺上降輿。入殯殿。於東旁坐。讀祝官奉祭文至闕外正中跪讀。哀暫止。衆皆跪。讀畢。俟進饌畢。進奠几。大臣進爵。

高宗純皇帝於坐次奠酒三爵。每奠。衆皆行一叩禮。乃徹饌。

聖駕回鑾。讀祝官奉祭文送燎所。遣官祭酒三爵。衆隨

舉哀行禮畢。各退。

大祭及百日致祭。皆遣親王行禮。

○是日。成

服人皆除服剃頭。

皇太子近前侍衛執事人內監等。至百日後剃頭。

次日繹祭。用金銀錠楮錢各七千五百。饌筵九

席。羊三。酒三尊。辦理喪儀大臣。暨禮工二部內

務府光祿寺堂官。及內府成服官員男婦齊集。

二十七日大祭禮。與初祭同。次日繹祭。與前次

繹祭同。十一月行初周月禮。適逢齋戒。改期初七日。用金銀錠楮錢各二萬五千。饌筵十有七席。羊七。酒七尊。設儀駕。齊集行禮。二、三周月。皆用金銀錠一萬。楮錢一萬一千。饌筵十有一席。羊五。酒五尊。百日致祭。用金銀錠楮錢各三萬。楮帛一萬。饌筵十有九席。羊七。酒七尊。設儀駕。照例齊集。百日後。每日三次奠獻。周月致祭。皆停止。冬至。歲暮。清明。中元。皆設饌筵十有五席。羊五。酒五尊。清明不焚楮帛。進挂楮錢寶花一座。中元。冬至。歲暮。用金銀錠楮錢各一萬五千。

皆不齊集。期年致祭禮儀與百日同。再

皇太子金棺。漆飾三十五次。照欽天監擇吉。於本
年漆飾二三次。俟明春再行漆飾。○十一月初
五日。以次日派親王郡王為正副使。

冊諡皇太子。遣官告祭

太廟後殿

奉先殿。○初六日。鑾儀衛陳

皇太子儀駕於田村

殯宮大門外。內府官設

冊寶案各一於

几筵前左右。設祝案於左。鴻臚寺官設

冊寶案於

太和門階上正中。設綵亭於階下。正副使及執事
各官咸素服。於階下東旁序立。內閣學士奉絹
冊寶。大學士隨行。升中階。設各案上。行一跪三叩禮。退
立階下之東。禮部堂官引正副使由東階升。詣

冊寶案前行一跪三叩禮。興。恭奉

冊寶由中道降階。設綵亭內。一跪三叩興。校尉舁亭前
列黃蓋

御仗由中道出。正副使後隨。內大臣侍衛於

午門內金水橋跪送。王以下奉恩將軍以上。於午門外常朝處跪送。候過隨行。綵亭由

長安右門出阜城門。民公侯伯以下。四品官以上。豫往

殯宮大門外。分翼齊集。俟綵亭至跪迎。亭入中門至二門止。正副使詣亭前一跪三叩興。奉絹

冊寶進

殿陳設於案。詣香案前上香。宣

冊寶官各宣

冊寶如儀畢。正副使行一跪三叩禮。由西門出。次鴻臚